

宋太宗實錄殘本

二



宋太宗实录残本 一函二册

撰者 宋·钱若水等

出版 中国书店

北京琉璃厂西街十八号

印刷 韩管古籍印刷厂

北京大兴

发行 新华书店首都发行所

一九九四年六月

ISBN 7-80568-543-6/K·114

定价：50元

太宗皇帝實錄卷第四十一

起雍熙四年五月盡八月

五月甲子定國軍節度使崔翰自高陽關來朝召之也乙丑以容州觀察使劉文裕充鎮州兵馬部署以侍御史鄭宣司門員外郎劉墀戶部員外郎趙載並充如京使以殿中侍御史柳開爲崇儀使左拾遺劉慶爲西京作坊使先是上以五代戰爭已來自節鎮至刺史皆用武臣多不曉政事人受其弊上欲兼用文士漸復舊制故先擢宣等爲內職丙寅命使分往諸郡市民間馬補戰騎之闕第其價爲三等壬申忠武軍節度使并州兵馬都部署潘美徵赴關癸酉以右羽林軍大將軍石曦知霸州兼兵馬部署乙亥宴近臣於長春殿以田重進崔翰潘美來朝勞之也丙子以左拾遺曹諫爲崇儀使諫知定遠軍會虜入寇

兵少而城不固人心危懼欲降於虜諫斬數人乃定因率  
勵士卒虜不敢犯遂引去 上聞之降詔敦諭賜五品服  
未幾召赴闕乃改授此命丁丑月有食之是日斬秦州長  
道縣酒務官李益益秦州富人家僮數百人橫恣郡中所  
為多不法持吏長短郡守以下皆畏之民負益息錢者數  
百家郡為徵督急於租調觀察推官馮伉不為益徵息錢  
益怒之伉方按行市中益遣私奴數輩拽伉下馬毀辱之  
伉不能甘先是益多通貨於朝中權貴率為庇護故累年  
不敗至是伉上章論其事章兩上皆為邸吏所匿不得達  
後因市馬譯者附表訴益不法事譯因隨歲市馬入得見  
即上其表 上覽之大怒詔本郡捕益詔書未至京師權  
貴已先報益知益懼因亡命州以聞 上愈怒詔州郡以

物色捕之甚急數月獲於河中府富人郝氏家械送御史  
府鞫之具得其狀抵罪籍沒其家財其子士衡先舉進士  
任光祿寺丞詔除其籍終身不齒益之伏法郡民皆快之  
以爲除去災害醪錢飲酒以相慶庚辰改殿前司日騎爲  
捧日驍猛爲拱辰雄勇爲神勇上鐵林爲殿前司虎翼股  
弩爲神射侍衛步軍司鐵林爲侍衛司虎翼辛巳右拾遺  
直史館孟知化餽籍配隸商州坐知懷州日受賕爲姦賊  
也壬午以光州刺史王明知并州潭州言衡山嶽廟忽有  
風雨廟吏聞殿上奏音樂明日見架上鼓置于地癸未彰  
國軍節度使駙馬都尉王承衍自天雄軍來朝徵之也丁  
亥詔曰俞扁之方人命所繫豈無至術宜在精求應諸道  
醫人藝術精練爲眾所推者仰本處舉送令太醫署考校

以聞庚寅 上製平戎萬全陣圖出示近臣因召邊將田重進潘美崔翰等陞殿親授其進退攻擊之方略重進等頓首謝辛卯以秘書丞王嗣宗爲河北東路轉運副使太子中允高象先爲西路轉運副使

六月壬辰朔以內殿直都虞候李貴爲龍衛左第四軍都指揮使領河州刺史以散員都虞候李琪爲龍衛右第四軍都指揮使領澄州刺史以散祇候都虞候趙業爲拱辰上十指揮使領播州刺史以金槍都虞候李希文爲拱辰下十指揮使領驩州刺史以散祇候都虞候麴斌爲殿前都指揮使左班都虞候領敘州刺史以散都頭都虞候郭密爲殿前都指揮使右班都虞候領富州刺史以馬步軍副都軍頭權管拱辰上十指揮使皇甫繼明爲捧日右第

三軍都指揮使領羅州刺史以天武左第一軍都虞候張祚爲殿前司虎翼左第三軍都指揮使領珍州刺史以天武右第一軍都虞候劉進爲步軍司虎翼左第二軍都指揮使領蒙州刺史以天武左第二軍都虞候賈榮爲步軍司虎翼右第二軍都指揮使領春州刺史以御龍直都虞候孫謙領勤州刺史以御龍骨錄子直都虞候孟珂領潘州刺史以御龍弓箭直都虞候王瓊領辰州刺史以御龍弩直都虞候楊瓊領顯州刺史以御龍左第二軍都指揮使傅思諺爲龍衛右廂都指揮使領獎州團練使以馬步軍都軍頭李斌爲神衛右廂都指揮使領溪州團練使甲午以天武右第二軍都虞候李福爲神勇上十都指揮使領潯州刺史以天武左第三軍都虞候孫進爲神勇下十

都指揮使領高州刺史以天武右第三軍都虞候趙嗣爲  
殿前司虎翼右第二軍都指揮使領錦州刺史以神衛第  
三軍都虞候王祚爲宣武軍都指揮使領雷州刺史丙申  
以內弓箭庫使領媯州刺史王文寶爲東上閣門使丁酉  
以右驍衛上將軍劉廷諤知雄州兼兵馬都部署以左衛  
上將軍知雄州張永德知定州戍戍以彰國軍節度使駙  
馬都尉王承衍充貝冀州兵馬都部署以宣徽北院使郭  
守文郢州團練使田欽祚並爲北面排陣使以宮苑使河  
州刺史王繼恩充排陣都監庚子以定國軍節度使崔翰  
復爲高陽關兵馬都部署以彰德軍馬步軍都指揮使邢  
任爲馬步軍副都軍頭領顯州刺史詔曰向者嶺南關宜  
多權以攝官處之而多非其人自今並令試問吏理稍有



可取卽選用之三年無違關送赴京當與出身敘錄郢州團練使田欽祚卒欽祚潁川人也父令方漢乾祐中任虢州團練使有伶人請邊庭者令方之輿隸也邊庭妻有美色令方通之邊庭不勝其忿會河中李守貞永興趙思綰鳳翔王景崇等各據城叛自陝以西人情大擾邊庭夜率其徒十數輩害令方於公署因掠郡民西趣投思綰潼關護軍閉門拒之出兵捕逐其眾乃敗朝廷遂擢欽祚爲殿直未幾改供奉官 太祖之討蜀也欽祚嘗乘驛往來報機事蜀平遷西上閣門副使後以何繼筠敗戎虜屢有功遷閣門使判四方館事領賀州刺史開寶八年從曹彬平江南以功領汾州防禦使 上卽位遷引進使太平興國四年從征太原使督前鋒騎兵屯石嶺關以捍北虜欽祚

性剛戾貪財復負氣凌物與眾不協眾皆惡其爲人會爲部下所訟鞫得實就降爲睦州團練使未幾改房州逾年改柳州以遠郡炎瘴鬱鬱不樂以至成疾累表陳乞願生還闕下言甚激切上憐之遷郢州團練使詔令入覲欽祚見上感泣不已會將北伐以爲行營排陣使素已抱疾因不勝其熹而卒年六十欽祚之典石嶺軍也大將郭進屢有戰功爲欽祚所凌轢進不能甘遂白經死事甚曖昧時皆以爲欽祚殺之左右無敢言者欽祚性陰狡率易不喜儒生好狎侮同列人皆鄙之辛丑以龍衛軍都指揮使康保裔充馬步軍都軍頭癸卯邢州進白烏甲辰詔諸道州郡置徵欠司從戶部判官袁胤推官崔維翰之請也以右千牛衛大將軍分司西京曹翰爲左千牛衛上將軍丁

未以崇儀副使薛繼昭爲文思使。懷州觀察使知澶州駙馬都尉魏咸信來朝召之也。戊申賜修汴口卒人千錢。以比部郎中樊若水爲駕部郎中。充河北東路轉運使。威塞軍節度使知孟州駙馬都尉石保吉。愛州團練使知鄆州駙馬都尉吳元辰。右衛上將軍知霸州宋偓。皆來朝召之也。詔應庫藏有脫漏不附籍者。自今皆以監主自盜論罪。至死者。奏取敕裁。從侍御史張泌之請也。準律忘失簿書致有乖錯。計所錯準盜論罪。止徒二年。泌以管庫之吏宜峻其法。乃降是詔。己酉。以蘄州防禦使譚延美爲亳州防禦使。汝州刺史李延嗣爲本州團練使。庚戌。以威塞軍節度使駙馬都尉石保吉知大名府。以愛州團練使駙馬都尉吳元辰知孟州。是日酉時。西北方有大流星。其聲如雷。

王子以東上閤門使王文寶充北面排陣都監并州都部  
署潘美定州都部署田重進高陽關都部署崔翰貝冀州  
都部署王承衍鎮州都部署劉文裕並辭赴治所是日宴  
近臣於長春殿餞潘美等赴北面行營也命陳王元僖餞  
北面將帥於含芳園以鹽鐵推官太子中允張茂宗爲六  
宅副使水部員外郎劉湛爲如京使丁巳入內都知洛苑  
副使王仁睿卒詔贈內侍省內常侍 上在晉邸仁睿時  
年十餘歲服勤左右甚淳謹上卽位典掌宮闈出納之命  
嘗與柴禹錫等發秦邸陰事至是卒特加贈典非常例也  
戊午鄜州獻馬前足如牛以知廣州左諫議大夫許仲宣  
知江陵府

秋七月壬戌朔以侍衛馬軍都虞候李繼隆領武州觀察

使侍衛步軍都虞候戴興領雲州觀察使癸亥以馬步軍副都軍頭王筠領巖州刺史充龍猛都指揮使以步軍都軍頭宋璘領敘州刺史充宣武下十都指揮使賜禮部侍郎李至月給本官全俸先是至以目疾罷知政事特給俸錢十萬至以端坐私室而享厚祿不自安遂置而不敢請

上知之特給全俸優之也以邕州觀察使劉知信爲并州兵馬副部署以亳州防禦使譚延美爲鎮州兵馬鈐轄以汝州團練使李延嗣護高陽關屯兵乙丑捧日天武四廂都指揮使朔州防禦使王杲卒杲京兆人也有武力善騎射上在晉邸召致左右及卽位擢爲日騎指揮使從征河東率兵督梯衝急攻城上驚其太猛亟召令下累遷至殿前指揮使左班都虞候領順州刺史馬步軍都軍

頭領寰州團練使遷四廂都指揮使領朔州防禦使雍熙  
四年春胡虜南寇以杲爲滄州行營副部署軍敗杲力戰  
僅以身免詔歸朝至是卒年五十九御製早秋詩二首立  
秋日暮雨詩一首賜近臣己巳以戶部員外郎知雜事陳  
象輿兼知吏部選事壬申以神武都虞候王祚爲宣武都  
指揮使領雷州刺史丙子中元節京城張燈御製五言十  
韻觀燈詩賜宰相等己卯以金州觀察使錢信判和州以  
右領軍衛大將軍李仲寓爲郢州刺史仲寓故追封吳王  
煜之子也 上憫其聚族京師故有是命庚辰詔置三班  
院以崇儀副使蔚進掌其事先是供奉官殿直殷承旨  
悉隸宣徽院至是以其眾多或出使於外有訴以勞逸不  
均者因命別置院考校殿最引對便殿定其黜陟焉辛巳

銀州獻白兔以如京使慕容德豐爲西上閤門使領蔚州  
刺史丁亥以度支推官左拾遺孔憲爲河東轉運副使以  
前濱州刺史高保膺爲右監門衛大將軍庚寅以蔡州刺  
史符昭愿充邢州兵馬鈐轄詔曰比部郎中王龜從先負  
永興軍官錢二十八萬特除之以龜從知德州陷虜故也  
八月辛卯朔兵部郎中楊徽之進雍熙詞五言六韻凡十  
章 上覽而嘉賞依韻和以賜之甲午以營州防禦使盧  
漢贇爲右監門衛大將軍乙未以右補闕李鵬舉充荆湖  
轉運使詔曰薦賢舉善合徇至公行爵出祿固無虛授苟  
必得其才實亦何恡於寵恩近者諸處奏薦多是親黨旣  
傷公道徒啟倖門用塞津蹊宜行條貫自今諸路轉運使  
副及州郡長吏並不得擅舉人充部下官如有闕員處當

以狀聞詔開封尹陳王元僖餞郭守文等於含芳園己亥  
鹽鐵使張平卒平北海臨朐人也嘗事單州刺史羅金山  
金山自單治滁遂補本州馬步軍都虞候上在晉邸知  
其才召致左右尋爲涪陵公親吏後數年有譖平於涪陵  
者因罷遣之平歎曰吾雖蹇剝然以時勢觀之未必不爲  
福上卽位擢爲右班殿直監市木於秦隴轉供奉官未  
幾涪陵敗人以爲有先見四遷至客省使雍熙中授鹽鐵  
使初平市木於秦隴也嘗有賊姦至是知爲陝西轉運使  
李奚所發遂憂恚成病而卒年六十三輟視朝一日贈右  
千牛衛大將軍庚子以虢州刺史劉宇爲右監門衛大將  
軍以右監門衛大將軍欽州刺史陳廷山護冀州屯兵詔  
曰在京水運諸倉先是倉吏概量爲姦致外州吏通官米



二十六萬七千石並除之甲辰御製春夏秋冬松風雪月  
煙花詩共五十首賜宰相李昉等詔曰應除授廣南西川  
瀋泉福建州縣官等訪聞久拘選調多是貧虛涉此長途  
將何以濟自今並令給券宿於郵置御製中秋翫月詩二  
章歌一首賜宰相已酉合羅川回鶻第四族首領遣使朝  
貢水部員外郎諸王府侍講邢昺進分門禮選二十一卷  
賜帛三十段銀器二事丁巳以殿中侍御史呂祐之爲右  
補闕直史館

太宗皇帝實錄卷第四十一